

**Starfsreglur ræktunardeilda
Hundaræktarfélags Íslands**
(Gildir frá október 2012)

I. Markmið

1. Markmið ræktunardeilda Hundaræktarfélags Íslands er að standa vörð um ræktun viðkomandi hundakyns/kynja, að vera ráðgefandi og að miðla fræðslu eins og stendur í lögum HRFÍ sjá VII kafla, greinar 19, 20, 21, 22 og 23.

II. Stofnun ræktunardeilda

Ræktunardeildir HRFÍ eru þrenns konar og eru þær skilgreindar á eftirfarandi hátt:

- a) Ræktunardeild um eitt hundakyn sem kallast sérdeild. Sjá grein 1.
- b) Ræktunardeild um tvö eða fleiri hundakyn sem tilheyra sama tegundahópi og hafa svipaða meðfædda eiginleika kallast hópdeild. Sjá grein 2.
- c) Í safndeild eru þau hundakyn sem ekki tilheyra sérdeild eða hópdeild. Sjá grein 3.

1. Hægt er að stofna ræktunardeild um eitt hundakyn sem telur 12 óskylda ræktunarhunda. Þessir hundar skulu hafa náð 1. einkunn á viðurkenndum hundasýningum auk þess að teljast heilbrigðir ræktunarhæfir einstaklingar. (sérdeild – sbr. Deild íslenska fjárhundsins).
2. Til að heimild fái til að stofna ræktunardeild um tvö eða fleiri hundakyn, þurfa þau að vera skyld að útliti og eiginleikum. Annað kynið þarf að uppfylla sömu skilyrði og í grein I. (Hópdeild – sbr. Retrieverdeild).
3. Heimilt er að stofna safndeild um fleiri hundakyn. Til safndeildar teljast þau hundakyn sem tilheyra ekki öðrum sérdeildum. Í safndeild er hægt að velja sérstaka tengiliði fyrir hvert hundakyn sem telja a.m.k. 12 eigendur sem eru félagsmenn í HRFÍ. Tengiliðir skulu gegna því hlutverki að miðla upplýsingum um kynið og vera stjórn deildarinnar til aðstoðar eftir því sem við á hverju sinni. Stjórn safndeildar getur sett tengiliðum sérstakar starfsreglur. Einungis þeir sem hafa verið félagsmenn í HRFÍ í 2 ár og hafa góða þekkingu á viðkomandi hundakyni geta gefið kost á sér sem tengiliðir. Sé tengiliður kosinn til starfa í stjórn deildarinnar skal velja nýjan tengilið í hans stað.
4. Telji stjórn HRFÍ grundvöll vera fyrir stofnun nýrrar deildar skal tillaga þess efnis lögð fyrir aðalfund HRFÍ til samþykktar samkvæmt 19. og 21. grein laga HRFÍ.

III. Stjórn ræktunardeilda

1. Stjórn ræktunardeildar skal skipuð fimm félagsmönnum. Einungis þeir sem hafa verið félagsmenn í HRFÍ í tvö ár geta gefið kost á sér í stjórn ræktunardeildar.
2. Kosning í stjórn ræktunardeildar fer fram á ársfundi deildarinnar ár hvert. Hver stjórnarmaður er kosinn til tveggja ára í senn. Endurkjör er leyfilegt. Kosningarrétt og kjörgengi á ársfundum deilda hafa þeir, sem eru skráðir eigendur hunda eða hafa verið skráðir eigendur hunda í viðkomandi deild í tvö ár og skuldlausir við félagið það ár sem ársfundur er haldinn. Hjón hafa kosningarétt og kjörgengi hvort heldur þau greiða félagsgjald sem hjón eða í sitthvoru lagi sé

annað þeirra skráð fyrir hundi í deildinni. Á fyrsta fundi eftir ársfund skal stjórn velja sér formann.

3. Í hóp- og safndeildum skal leitast eftir því að þeir sem sitja í stjórn deildarinnar séu fulltrúar mismunandi hundakynja. Þeir sem gefa kost á sér til stjórnarstarfa í safndeildum verða að starfa af sömu ábyrgð fyrir öll hundakyn sem tilheyra deildinni.
4. Þeir sem sitja í stjórn ræktunardeilda og nefnda ásamt tengiliðum eru fulltrúar Hundaræktarfélags Íslands. Þeir skulu gæta trúmennsku í störfum, leggja sitt af mörkum til að efla félagið og standa vörð um hagsmuni þess. Þeir sem valdir eru til stjórnarstarfa þurfa að þekkja lög og reglur HRFÍ og starfa samkvæmt þeim í sérhverju máli sem þeim er falið að vinna.
5. Stjórn ræktunardeildar skiptir með sér verkum og ber alla ábyrgð á starfsemi deildarinnar. Stjórn getur tilnefnt í nefndir s.s. ræktunarnefnd, sýningarnefnd, ritnefnd, tölvunefnd, göngunefnd og fl. Stjórn deildarinnar hefur yfirumsjón með störfum þessara nefnda og skal ítrekað að henni sé fullkunnugt um alla starfsemi sem þar fer fram hverju sinni.
6. Ársfundur ræktunardeildar skal halda í mars ár hvert. Til hans skal boðað með a.m.k. 7 daga fyrirvara í dagblaði, á heimasíðu félagsins eða í Sámi. Hlutverk ársfundar er að velja ræktunarstjórn og taka ákvarðanir í málum, sem stjórn deildarinnar eða stjórn HRFÍ kys að bera undir fundinn. Stjórn ræktunardeilda skal skrifa skýrslu um starfsemi deildarinnar ár hvert. Skýrslan skal gefa skýra mynd af ræktunarstarfi og öðrum störfum innan deildarinnar. Þar skal einnig koma fram áætluð starfsemi á nýju starfsári. Ræktunardeildir með eigin fjárhag s.s. vegna sýningarþjálfunar, reksturs vefsíðu, kaffisjóðs o.þ.h. skulu sækja um kennitölu fyrir viðkomandi ræktunardeild til Fyrirtækjaskrár og leggja fram rekstrar- og efnahagsyfirlit á ársfundi deildarinnar. Eftir ársfund deildarinnar skal samhljóða skýrslum skilað til stjórnar HRFÍ.
7. Við stofnun nýrrar deildar skal tilgreina fimm stjórnarmenn, sem sjá um að boða til ársfundar deildarinnar innan mánaðar frá stofnun hennar. Til fundarins skal boðað með a.m.k. 7 daga fyrirvara í dagblaði, á vefsíðu félagsins og heimasíðu deildarinnar. Á fyrsta ársfundi nýrrar deildar skal kjósa þrjú stjórnarmenn til tveggja ára og tvo til eins árs. Ávallt skal færa fundargerð á aðalfundi sem og á öðrum fundum stjórnar ræktunardeildar. Í fundargerðabók skal koma fram dagsetning funda, helstu mál o.fl. Greina skal frá kosningu stjórnarmanna ásamt atkvæðafjölda í fundargerðabók.
8. Deild íslenska fjárhundsins ber ábyrgð á verndun, ræktun og heilbrigði íslenska fjárhundsins í umboði stjórnar HRFÍ. Stjórn tilnefnir því fulltrúa sinn í stjórn deildarinnar til tveggja ára í senn. Fulltrúinn situr sem áheyrnarfulltrúi með tillögurétt í stjórn DÍF og er hlutverk hans að vera sérstakur tengiliður milli stjórnar HRFÍ og DÍF um málefni sem varða íslenska fjárhundinn.

IV. Starfssvið ræktunarstjórna

1. Ræktunarstjórn er ráðgefandi aðili um allt er viðkemur ræktun, eðli og umhirðu viðkomandi hundakyns. Ennfremur ber ræktunarstjórn að fræða um sögu kynsins, heilbrigði og uppruna.
2. Stefna ræktunarstjórnar skal vera að beina allri ræktun í þá átt að einstaklingar kynsins séu:
- Andlega og líkamlega heilbrigðir.

- Án erfðagalla.
 - Uppfylli kröfur ræktunarmarkmiðs kynsins um útlit og byggingu.
 - Uppfylli þær kröfur sem gerðar eru um vinnueiginleika kynsins.
3. Ræktunarstjórn er einungis ráðgefandi aðili um allt er varðar ræktun ættbókarfærðra hunda sem standast tilskyldar kröfur um undaneldi, í samræmi við ræktunarmarkmið kynsins og ættbókarreglur HRFÍ.
 4. Öll ábyrgð á ræktun hvílir alfarið á tíkareiganda og eiganda hundsins.
 5. Félagsmanni í HRFÍ er óheimilt að nota ættbókarfærðan hund eða tík til undaneldis með hundi/tík af blönduðu kyni eða öðru hundakyni. Sé það gert af ásetningi er ræktunarstjórn heimilt að víkja viðkomandi úr deildinni. Samkvæmt skilgreiningu FCI eru allir hundar, sem ekki eru með ættbók frá hundaræktarfélagi viðurkenndu af FCI, taldir blendingar.
 6. Ræktunarstjórn skal vera félagsmanni HRFÍ til ráðgjafar og:
 - aðeins vera skylt að taka til meðferðar skriflegar fyrirspurnir um ræktun og undaneldi hunda sem eru ættbókarfærðir hjá HRFÍ og öðrum hundaræktarfélögum, sem FCI viðurkennir.
 - aðeins vera ráðgefandi aðili í fyrirspurnum félagsmanna HRFÍ um ræktun og undaneldi.
 - Ræktunarstjórn skal ennfremur:
 - halda saman öllum umsögnum frá sýningum prófum og heilbrigðiskönnunum.
 - halda saman upplýsingum um hugsanlega erfðagalla sem kunna að finnast í viðkomandi hundakyni.
 - koma á framfæri í Sámi og á vefsíðu ræktunardeilda, fræðslu og upplýsingum um heilbrigði, ræktun, og undaneldi þess hundakyns sem ræktunardeildin stendur vörð um.
 7. Auk ofantalinna atriða er ræktunarstjórn skylt að takast á hendur nánar tilgreind sérverkefni sem stjórn eða vísindanefnd HRFÍ felur því í þágu ræktunar.
 8. Ræktunarstjórn skal leitast við að taka til meðferðar innan mánaðar þær skriflegu fyrirspurnir sem berast varðandi ræktun og undaneldi. Gera má ráð fyrir lengri afgreiðslufresti berist fyrirspurnir í jólaleyfi eða sumarleyfi.
 9. Svör við fyrirspurnum skulu vera skrifleg, dagsett, og undirrituð af fulltrúa ræktunarstjórnar.
 10. Leiti tíkareigandi ráða varðandi val á hundi til undaneldis, skal ræktunarstjórn benda á 3 hunda, sé það mögulegt. Undirstrika skal, að það er alfarið ákvörðun tíkareigandans hvaða hund hann notar.
 11. Skrifleg umsókn ræktanda um val á hundi til undaneldis þarf að hafa borist stjórn ræktunardeildar í síðasta lagi 2 mánuðum fyrir væntanlegt lóðarí tíkarinnar, eigi að vera hægt að taka hana til greina.
 12. Ábending ræktunarstjórnar gildir aðeins fyrir eina pörun og aðeins í 9 mánuði eftir dagsetningu pörunarumsóknar.
 13. Uppfylli tík/hundur ekki þau skilyrði sem ræktunarmarkmið hundakynsins setur og ættbókareglur HRFÍ kveða á um, ber að forðast allt undaneldi frá þeim.

V. Deildarsýningar

1. Ræktunardeildum er heimilt að halda deildarsýningar að fengnu leyfi stjórnar HRFÍ að fenginni umsögn sýningarstjórnar HRFÍ. Umsókn þarf að hafa borist stjórn HRFÍ eigi síðar en 6 mánuðum áður en sýning er fyrirhuguð. Stjórn HRFÍ getur heimilað sýningu sem sótt er um með styttri fyrirvara. Leitast skal við að velja dómara sem býr yfir sérþekkingu á viðkomandi tegund (tegundum).
2. Umsókn skal fylgja fjárhagsáætlun, stað- og dagsetning sýningar og hvaða tegund skal dæma (tegundir í tilviki hóp- og safndeilda). Umsókn og fjárhagsáætlun skulu vera á þar til gerðum eyðublöðum ([Umsókn um deildarsýningu](#), [Fjárhagsáætlun deildarsýningar](#)) sem aðgengileg eru á heimasíðu HRFÍ. Umsókn er metin ófullnægjandi ef niðurstaða fjárhagsáætlunar er neikvæð, þ.e. gjöld eru hærrí en tekjur. Hagnaður rennur til ræktunardeildar sem jafnframt ábyrgist á fullnægjandi hátt tap af viðkomandi sýningu.
3. Tillaga um dómara sem bjóða skal með hæfilegum fyrirvara, ber að fylgja umsókn. Boð til dómara skal vera skriflegt, með bréfi eða tölvupósti, sent af formanni ræktunardeildar með afriti til framkvæmdastjóra og sýningarstjórnar HRFÍ.
4. Stjórn ræktunardeildar skal skipa sýningarnefnd sem ber ábyrgð á að framkvæmd sýningar sé samkvæmt sýningareglum HRFÍ.
5. Undirbúningur, skipulag og framkvæmd sýningar er í höndum sýningarnefndar ræktunardeildar. Stjórn ræktunardeildar getur óskað eftir aðstoð sýningarstjórnar HRFÍ. Ræktunardeildir geta fengið sýningarmuni að láni hjá HRFÍ gegn tryggingu fyrir skilum og skemmdum. Að fengnu leyfi fyrir deildarsýningu skal sýningarstjórn ræktunardeildar skila útfylltu eyðublaði ([Framkvæmd sýningar](#)) til HRFÍ sem aðgengilegt er á heimasíðu félagsins. Ræktunardeild leggur til fólk til aðstoðar á skrifstofu HRFÍ ef óskað er, vegna undirbúnings sýningar og/eða úrvinnslu sýningargagna. Skráning á deildarsýningu og greiðsla skráningargjalds fer fram á sama hátt og á aðrar sýningar félagsins. Skila ber uppgjöri til HRFÍ eftir sýningu ásamt reikningum. Verð deildarsýningar og aflættir eru skv. gjaldskrá félagsins.
6. Starfsreglur ræktunardeilda nr. V.1 til V.5 hér að ofan gilda einnig um ræktunarskoðun hunda.
7. Að öðru leyti gilda sýningareglur Hundaræktarfélags Íslands og dómaraegluglur FCI.
8. Stjórn HRFÍ er heimilt að veita undanþágu frá þessum reglum.